

Ess letzdemol vom Rathenauplatz

Om letzde Freidaach habb ich de Schorsch unn soi Kättche uffem Markt getroffe. Ich hadd noch nitamol Gude gesacht, doo hott dess Kättche schunn gegauzt: Du immer mett doine Idee – enn Spillplatz ferr Seniorn uffem Rathenauplatz! Ich saach derrs: Moiner gieht nit doohie!

Ich war gonz verschrocke unn habb gefroocht: Ei Kättche, warum dann nit?

Ess Kättche war zimmlich laut: Moiner gieht nit doohie. Du glaabst doch nit dass dort nor Männer spille. Dess dauert nit long unn enn Stall von Wittweiwer mächt doo erum. Unn die erst von dene iss die Seechern.

Wasde nor immer mette Frau Seecher host, hott de Schorsch gemurmelt, unn schwupp! hottems Kättche onns Boo getrete. Dann mächtse weider: Also Honnes, ich saach derrs: Wenn de Schorsch die Spillgeräte dorchgemacht hott, werrder sich uff oo von dene Bänk setze. Uff oomol kimmt dann die Seechern unn setzt sich newern. Die hott dann enge Jeans oo unn e Blus, in die de weit enoi gucke konnst, unn dann greiftse in ihrn Hosesäckel, hollt ihr Händy eraus un sächt zum Schorsch, obber ihr mol helfe kennt, weil uff dem Händy wär so e Mehl, doo kenntse nix demett oofonge. Unn dann gibtse dem Schorsch dess Händy in die Hond unn lässt noch e bissi ihr foine Fingerscher droo.

Die hott werklich foine Fingerscher, hott de Schorsch jetz schunn e bisje lauder gesaat, weiler sich dann doch nit vom Kättche unnerbuttern losse wollt, unn schwupp! hottems Kättche ons onnern Boo getrete.

Dann hottse weider gemacht: Die Seechern hott joo aach noch nie was geschafft. Iwwerichens - wo host du dann dere ihr Finger geseh? He? Egal! Odder die Dinger wo de dich druffstelle dust unn owachtbasse musst dassde nit erunnerfällst, die ferrs Gleichgewicht. Doo seh ich schunn jetz die Seechern drufferummache unn heer se kreische vor Jux unn Dollerei unn de Schorsch, der ahle Depp, gieht hie unn hält ihrs Händche: Basse se uff, Frau Seecher, dassde nit erunnerfalle unn sich beim Absteihe nit verknaxe, es wär doch schad um so scheene Boo! Unn die sächt: Ach Georg, sag doch einfach Gisela zu mir! Unn dann ess Letzde: Uff so emm Spillplatz gebs aach was, doo misst merr uffem Boddem so bunte Stoo in Figurn oisetze. Moont ooner von eich, ihr det dess mache? Naa, ihr nit. Awwer die Wittweiwer bigge sich unn leeche Stooscher in die Figurn!

Dess Kättche war so in Form, dasses uns vorgemacht hott. E bissi peinlich wars emm Schorsch dann doch, wie soi Fraa ihrn dicke Hinnern in die Luft gestreckt unn im Bigge gerufe hott: Ei dess iss dann grad wie uffem Kerchhof, wo die Wittweiwer sich so bigge misse wennse uffem Grab von ihrm Monn häckele, wie uffem Kerchhof iss dess, wo dess Bigge die Wittmänner dezu bringe dut selbst enner trauernde Witwe oozebiete, mettem hoom ze gehe, um sich soi Briefmarkesommlung oozegucke. Weil so enn Monn denkt, wenn ich die doo vorne nit zu mir hoom kriehe, dann schaffts der Olwel dort hinne, weil der guckt aach schunn die gonz Zeit nooch dere ihrm Gehäckel. So kimmt dess, glaabt merrs, unn dann hawwe merr aach bald enn Uznome ferr den Platz: Der heeßt dann Frau-Holle-Platz!

Frau-Holle-Platz? – ei warum donn dess, habb ich gefroocht.

Ja, Frau-Holle-Platz. Weil wenn dess so kimmt wie ich gesaat habb merr schunn bald heern kann wie irchendwo die Bettdecke geschittelt werrn. Naa, moin Schorsch gieht nit doohie!

Dann hotts Kättche mich schepp oogeguckt, de Schorsch hott mett de Achsele gezuckt als woldder saache: Was soll ich dann mache?, unn dann sinn die zwaa fort unn hawwe mich mettem dumme Gesicht unn mett moiner scheene Idee vom Flerschemer Platz zurickgelosse.

Eiern Honnes